



Majlis Ugama Islam Singapura

Khutbah Jumaat

22 Julai 2016 / 17 Syawal 1437H

Al-Hilm Sebagai Rukun Kedua Hikmah

الْحَمْدُ لِلَّهِ الْغَنِيِّ الْحَمِيدِ وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَهُوَ عَلَى كُلِّ شَيْءٍ شَهِيدٌ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ الْمَبْعُوثُ بِالرَّحْمَةِ وَالْقَوْلِ السَّدِيدِ، اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ وَسَلِّمْ تَسْلِيمًا كَثِيرًا. أَمَّا بَعْدُ، فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang saya kasihi,

Marilah kita bertakwa kepada Allah s.w.t. dengan sebenar-benar erti ketakwaan. Laksanakan segala titah perintahNya dan jauhi segala tegahanNya. Semoga kita dikurniakan keampunan dan kemaafan dan digolongkan di kalangan hamba-hamba Allah yang bertakwa. Amin.

Saudaraku,

Insan manakah yang tidak bergembira sekiranya beliau diberitahu oleh Rasulullah s.a.w. bahawa beliau dicintai oleh Sang Penciptanya?

Marilah sama-sama kita merenungkan pesanan Rasulullah s.a.w. kepada Asyaji ‘Abdil Qays r.a.:

إِنَّ فِيكَ خَصْلَتَيْنِ يُحِبُّهُمَا اللَّهُ الْحِلْمُ وَالْأَنَاءُ

Yang bermaksud: “*Sesungguhnya di dalam diri kamu terdapat dua sifat yang dicintai Allah: Al-Hilm (lemah lembut) dan al-Anah (ketenangan)*”. [Hadis riwayat Muslim]

Sidang Jumaat yang dikasihi Allah,

Di sana terdapat banyak jalan untuk kita meraih cinta Allah s.w.t, di antaranya adalah menghiasi diri dengan dua sifat yang disebutkan sebentar tadi iaitu *Al-Hilm* dan *Al-Anah*. Apakah yang dimaksudkan sifat *Al-Hilm* dan sifat *Al-Anah*?

Al-Hilm bererti seorang dapat mengawal dirinya ketika marah, walaupun beliau mampu untuk bertindak balas terhadap orang yang menimbulkan kemarahan. *Al-Hilm* juga bererti seseorang itu sentiasa mengawal dirinya, di saat berhadapan dengan perkara yang kurang disenanginya ketika menimpa dirinya. Manakala *Al-Anah* bererti tidak tergesa-gesa dan ketenangan dalam melakukan sesuatu perkara.

Para ulama menjelaskan bahawa kedua-dua sifat tersebut melambangkan kematangan seseorang dalam berfikir dan kebijaksanaan seseorang dalam bertindak serta kemantapan kerohanian seseorang.

Sidang jumaat yang dikasihi Allah,
 Marilah sama-sama kita merenungkan bagaimana Rasulullah s.a.w. menghiasi dirinya dengan sifat *Al-Hilm*. Saidatina Aisyah r.a. meriwayatkan: “Sekumpulan orang Yahudi datang menemui Rasulullah s.a.w. lalu mereka berkata; “**Assaamu'**alaikum (yang bermaksud: semoga kecelakaan menimpa ke atas mu). Saidatina Aisyah r.a. berkata; “Saya memahaminya maka saya menjawab: *Wa'alaikumus Saam wal La'nah* (semoga kecelakaan dan laknat tertimpa ke atas kalian semua).” Aisyah r.a. berkata: Lalu Rasulullah s.a.w. bersabda: “Tenanglah wahai Aisyah, sesungguhnya Allah mencintai sikap lemah lembut pada setiap perkara.” Saya berkata: “Wahai Rasulullah! Apakah kamu tidak mendengar apa yang telah mereka katakan?” Rasulullah s.a.w. menjawab: “Saya telah menjawab: *wa 'alaykum* (dan semoga ke atas kalian juga).” [Hadith Riwayat al-Bukhari]

Subhanallah! Indah sungguh akhlak Rasulullah s.a.w.! Meskipun dihujani dengan kata-kata yang kasar, beliau s.a.w. tidak membalas kekasaran dengan kekasaran. Bahkan beliau membalas kekasaran dengan kelembutan. Hadith yang baru saya kongsiikan menunjukkan sifat *Al-Hilm* yang begitu tinggi yang dimiliki Rasulullah s.a.w. Perhatikan firman Allah s.w.t.:

فِيمَا رَحْمَةٍ مِّنَ اللَّهِ لَئِن لَّهُمْ لَوْ كُنْتَ فَظًّا غَلِيظَ الْقَلْبِ لَأَنْفَضُوا
 مِنْ حَوْلِكَ فَاعْفُ عَنْهُمْ وَاسْتَغْفِرْ لَهُمْ وَشَاوِرْهُمْ فِي الْأَمْرِ فَإِذَا عَزَمْتَ
 فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ

Maksudnya: “Maka dengan sebab rahmah dari Allah, engkau telah bersikap lemah-lembut kepada mereka, dan kalaulah engkau bersikap kasar lagi berkeras hati, tentulah mereka lari dari kelilingmu. Oleh itu maafkanlah mereka, dan pohonkanlah keampunan bagi mereka, dan juga bermesyuaratlah dengan mereka dalam urusan itu. Kemudian apabila engkau telah berazam, maka bertawakallah kepada Allah, sesungguhnya Allah mengasihi orang-orang yang bertawakal kepadaNya.”
[Surah Ali ‘Imran ayat 159]

Saudara,

Kepentingan sifat *Al-Hilm* ini tidak dapat dinafikan lagi. Lagi-lagi sekarang ini, kita melihat kata-kata kasar digunakan oleh sebahagian anggota masyarakat ketika meluahkan pandangan atau buah fikiran di lelaman sosial seperti Facebook dan seumpamanya. Maka ingin saya menyarankan beberapa langkah untuk menerapkan sifat *Al-Hilm* ketika berhadapan dengan *status* ataupun komen yang kurang disenangi di lelaman sosial.

Yang pertama, kita boleh memberikan respons dengan menggunakan kata-kata dan cara yang lebih baik. Kata-kata yang kasar tidak sepatutnya dibalas dengan kekasaran. Sebaliknya, ia harus dibalas dengan kesopanan dan kesantunan sebagaimana yang ditunjukkan oleh Rasulullah s.a.w. bahkan ia adalah satu sunnah Nabi s.a.w.

Saranan yang kedua: Kita hendaklah tenang dan berfikir sebelum memberikan apa jua respon. Bukan dalam semua situasi kita perlu memberi jawapan. Adakalanya berdiam diri adalah lebih baik daripada memberikan reaksi dan jawapan, terutama sekiranya ia boleh membawa kepada kemudaratan yang lebih besar daripada kemaslahatan yang ingin dicapai.

Sidang jumaat yang dirahmati Allah,

Seorang cendekiawan pernah menceritakan bahawa dahulu terdapat seorang pemuda yang amat bersemangat untuk mengajak manusia kepada kebaikan dan mencegah dari kemungkaran.

Pada suatu petang, dia mendapati seorang penggembala unta sedang berdendang agar unta-untanya bersemangat untuk berjalan. Pada saat tersebut, muazin sedang mengumandangkan azan maghrib. Maka sang pemuda mengherdik penggembala tersebut dengan keras, namun si penggembala unta tidak memperdulikan teguran pemuda tersebut. Maka, pemuda itu pergi kepada seorang 'alim untuk melaporkan kejadian tersebut.

Keesokan harinya, sang 'alim tersebut pergi ke tempat si penggembala pada waktu yang sama. Ketika azan maghrib dikumandangkan, beliau berkata dengan santun dan lemah-lembut kepada si penggembala, "Wahai saudaraku, azan

Maghrib telah dikumandangkan. Sebaiknya kamu segera menunaikan solat kerana Allah berfirman:

وَأْمُرْ أَهْلَكَ بِالصَّلَاةِ وَاصْطَبِرْ عَلَيْهَا لَا نَسْأَلُكَ رِزْقًا نَحْنُ نَرْزُقُكَ
وَالْعَقِبَةُ لِلتَّقْوَى ﴿١٣٢﴾

Maksudnya: *“Dan perintahkanlah keluargamu serta umatmu mengerjakan sembahyang, dan hendaklah engkau tekun bersabar menunaikannya. Kami tidak meminta rezeki kepadamu, (bahkan) Kamilah yang memberi rezeki kepadamu. Dan (ingatlah) kesudahan yang baik adalah bagi orang-orang yang bertaqwa.”* [Surah Toha ayat 132]

Maka si pengembala tersebut menjawab, “Semoga Allah membalas kamu dengan kebaikan.” Kemudian dia segera berwudhu’ dan pergi ke masjid beserta sang ‘alim tadi.

Saudara,

Dalam kisah ini, kedua-dua pemuda dan sang ‘alim mengajak kepada perkara yang sama iaitu agar si pengembala unta mendirikan solat maghrib tetapi pendekatan yang mereka ambil adalah berbeza.

Si pemuda tadi menggunakan pendekatan yang kasar dengan memarahi serta mengherdik si pengembala unta. Manakala sang ‘alim bersikap lemah lembut terhadapnya. Pendekatan yang digunakan pemuda tersebut tidak membuahkan hasil walaupun apa yang ingin disampaikan adalah benar.

Manakala pendekatan lemah lembut yang digunakan sang alim tadi berjaya menawan hati si pengembala untuk mendirikan solat.

Maka belajarlah dari kisah tersebut. Kadangkala, yang menjadi hambatan bukan kerana kita tiada maklumat agama tentang satu isu, akan tetapi apabila tiada “cara” dalam menegur. Maka hayatilah aspek hikmah dan *Al-Hilm* dalam pergaulan kita. Semoga kita dikurniakan akhlak dan ciri mulia, serta dipermudahkan untuk menghiasi diri dengan sifat *Al-Hilm* dalam segala tindakan dan perkataan kita. Semoga dengannya, kita dapat meraih cinta dan kasih sayang Allah s.w.t. Amin Ya Rabbal Alamin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.